

Gaz. Rom. no. 81 / 8-10-1968.

## † En memoria da Gion Antoni Beer, Sedrun

(Corr.) Il mardis dils 17 da settember ha nies bien vischin Gion Antoni Beer rendiu si'olma a Diu. Lein sefermar in amen per schar repassar avon nies egl spittal il cuors terrester da quei um d'atgna tempra. Siu viadi entscheiva ils 18 d'avrel 1889 a Gonda-Sedrun sco fegl da Beer Gion Bistgaun ed Onna Maria, nata Venzin. Ensemen cun ses dus fargliuns pli vegls passenta el cheu si'affonza. Il destin ei nuota migeivels, e gia da tschun onns privescha el il buobet, 1894, da siu car bab. Cun capientscha ed inschign surpren la mumma la bitgetta ed il mattatsch vegin gronds e ferm. Nus accumpaignein el alla scola primara da Sedrun e vesein el lu dus onns ella scola reala della claustra da Mustér.

Naschius e carschius el ravugl d'ina famiglia purila e stimulaus dals ses eis el sedecidius da deventar pur. En differents menaschis purils rimna Gion Antoni las necessarias exprienzas per silsuenter serender a casa, metter neu muvel e far il pur. Sch'el ha detg: «Jeu hai fatg il pur cun tschaffen e premura», lu astgein nus crer quei e nus savein era constatar ch'el ei staus fideiveis a sia clamada entochen che sias forzas ein tramuntadas.

Gl'atun 1909 daventa la casa dalla famiglia Beer l'unfrenda d'in barschament. Nuota lev, en in temps ch'ei deva aunc negina assicuranza da fiug! Il giuven Gion Antoni stat buca plirond sper las restonzas, mobein semetta immediat alla reconstrucziun d'ina nova casa. Contas stellas da suadetsch ei ha custau da metter tut material sil plaz, gliez sa mo el!

Igl onn 1921 sespresa Gion Antoni culla giuvna Onna Maria Geriet da Gonda, che schenghegia ad el 5 affons: 4 buobs ed ina mattatscha. Mirond anavos quitav'ins d'astgar constattar che nies bien convischin gudevi la favur dil destin. La providentscha haveva denton destinau autruisa e tuttavia buca spargnau al defunct cruschs e travaglias. La nauscha sort d'in criu destin ha fatg accumpignar el alla fossa dus fegls sil meglier: scolast Giusep da 23 onns e Cristian da 27 onns. Quei tgiembel da discleitg ha era sgurdinau las forzas dalla buna mumma e

consorta. Mo 61 onns veglia eis ella ida vi en in meglier mund.

En verdad, il destin ha buca pupergnau nies convischin Gion Antoni. El denton, in um religius e consciencius ha supportau las suffriendschas en resignaziun cristiana. Ils davos onns ha el passentau ensemble cun siu fegl Gion Battesta, ed ei fuss buca endretg da buca menzionar e renconuscher il quita, la capientscha e premura ch'el ha demussau visavi siu bab.

Per cuort avon la mort, per cura ch'il bien Gion Atnoni ha stuiu haver permanenta tgira eis el serendius el spital e silsuenter egl asil da vegls a Trun, nua ch'el ei lu spartius ell'autla vegliadetgna da bunamein 80 onns. Quest cuort viadi terrester dil car defunct che nus vein repassau en gronds sbargats fuss gleiti emblidaus, stess buca igl um ch'ha fatg el impregnau en nossa memoria. In um original e singul, in um da siu persei, consciencius cun sesez e cul vischin, in um ordvert spargnius che veva fatg ragisch en in temps da meins abundonza ch'ozildi, in caracter recli e gest.

Gion Antoni Beer era buca mo bab e pur, siu interess e sia capientscha valeva era als basegns culturals. Passa 40 onns eis el staus in fervent commember dil chor baselgia, plirs onns ha el era appartenu al chor viril ed alla musica instrumentalala. «Jeu erel era teatrist e quei cun predilecziun» quei san tats quels ch'han viu el sillia tribuna confirmar.

Uffecis e scharschas publicas encuntercomi untgeva nies convischin ton sco pusseivel, beinsavend ch'il pli bi e pli bien hagien ins el ravugl della famiglia. Nuotatonmeins ha era sgr. Gion Ant. Beer stuiu contribuir siu quatrins al public e survir a nossa vischnaunca sco cassier e gerau protocolist. Secapescha ch'il defunct ha aunc stuiu survir en outras cuminzanzas. Dapertut, sin mintga post gudeva el cumpleina confidonza muort sia exemplarica exactedad.

In bien vischin ha finiu sia cuorsa terrestre, ruauissa ussa ella pasch dil Segner. Ad el detti Dieus la meritada pagaglia, als ses confiert e benedicziun.